



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :

f Tir Yimyim

Instagram tirymyim@aolima

YouTube tir yimyim

TAPAK 8



FIR mebenoki ghonda 24 dak
tema ni sota ayu: Priyanka



Philippines tir atema Ferdinand
Marcos Jr-i tokteptsü

VOL. XVIII NO. 355 (ADOK 355) DIMAPUR

RASEMNÜ (WEDNESDAY) MONGPUTENI (OCTOBER) 06, 2021 ₹ 5.00

COVID-19 Nagaland: 20 dak putet & 18 taneptsü angu

Kohima, October 5, 2021 (TYO): Nagaland nung Mongulbarnü nisung 20 dak COVID-19 aliba putet aser parnok züngsema nisung ajak agi 31,342 kümogo.

"Testüba ghonda 24 tsüingda nisung 20 dak putet. Parnokji Kohima nung 10, Dimapur nung 8 aser Phek o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-ia shi.

"Kasa mapang COVID-19 puteta aliba nisung 18 tashi taneptsü angu. Parnokji Kohima nung 9, Dimapur nung 5 aser Kiphire o Mokokching nung anana (2) lir" ta paisa ashi.

Nisung 31,342 rongnungi 29,358 taneptsü nguogo aser ibaji 93.66% lir, ta Dr Kikon-ia shi.

Tang nisung 314 anepaludar saka parnok 234 dakbo shirangba yimya kecha mali, ta paisa metetdaksü.

"Hombatashi nung nisung 691,482 nem COVID-19 vaccine indang dose 10,75,519 agütsüogo" ta State Immunization Officer, Dr Ritu Thurr-ia shi.

Vaccine agirtemji frontline workers 60,942, healthcare workers 15,996, arishi küm 45 ser temapur 198,834 aser arishi küm 18 nungi 44 tsüingda alir 415,710 lir, ta paisa ashi.

"Vaccine agirtem rongnungi nisung 384,037-i dose anaprong agiogo. Parnokji frontline workers 47,404, healthcare workers 13,287, arishi küm 45 ser temapur 140,816 aser arishi küm 18 nungi 44 tsüingda alir 182,530 lir" ta Dr Thurr-ia metetdaksü.

United Democratic Alliance mezüing senden amen

Dimapur, October 5, 2021 (TYO): October 5, 2021 nü United Democratic Alliance (UDA) indang mezüingbuba senden amen.

India sorkari Indo-Naga yimjung maparen nung temolung agüja inyakba atema tenüngsang agütsür aser olemtepa telok ajak den nisung kati dang interlocutor mapa inyaksü shimba atema pelar, ta tanü senden nung telemteba agi.

Naga nungeri tekaratiba nung ajaki agizüktetsüsa telemteba ka agidaksünüba angateta lir. Iba ya aiben senden balala nung shiogo aser civil society temi iba tebilemtepa atema bangzüng

renemba pusema nungiter ta UDA-isa metetdaksü.

"Naga yimjung maparen nung UDA-i tiyongtsü nung inyaker ka ama yariteptsü. Mapang talangka nungi aginüa aruba telemteba agütsü atema ajak dang longjemtsü, putepshitsü aser ka akümtsü ayongzüker" ta Nagaland Chief Minister Neiphiu Rio, Dy. CM Yanthungo Patton, NPFLP Leader T.R Zeliang, NDPP President Chingwang Konyak, BJP President Temjen Imna Along aser NPF Working President Huska Yephthomi nungertemi külem sangdong ka nung metetdaksü.

Dy.CM-i Nagaland Police nem tenüngsang agütsür

Dimapur, October 5, 2021 (TYO): Nagaland Police indang Narcotics Cell-i October 4, 2021 nü Rs 22 crores alang hon apuba atema tenüngsang agütsür, ta Deputy Chief Minister & Home department minister incharge, Y. Patton-i metetdaksü.

Narcotics Cell-i Khuzama gate nung inter State Narcotics checkpoint nung hon aika apu.

"Iba ya Nagaland Police nüma atangba mapa ka lir aser otsü nung zülüoka ayutsü. Nagaland Police-i tangari ajizüktetsüsa mapa tajung inyaketog aser iba ya check gates nung amenertemi ajizüka benshitsu" ta Y Patton-ia shi.

"Tawa Nagaland Police

department-i oziung alema mapa inyakbatem kokteta inyaka aruba osang angashidang kanga pelar. Talisa police-i cyber crimes dak sendakba maparen kanga junga inyaker. Alima mapang melenshiba ama police-ia tajungtiba akümtsü aser shia meteta alitsü nungdaker" ta paisa ayongzüker.

"Nagaland Police indang Narcotics Cell-i Khuzama checkgate nung ochishia mapa inyakba atema tenüngsang agütsür. Maneni, CP Dimapur kübok police, NH 29 nung highway patrol aser state tenzüka wadang nung anibelega inyakba police ajak nem tenüngsang agütsür" ta Y Patton-ia shi.

Dimapur DC-i EHV lines kübok kiojen meyanglutsü tuyur

Dimapur, October 5, 2021 (TYO): Dimapur Deputy Commissioner-i Extra-high voltage (EHV) lines kübok ki meyanglutsü tetuyuba agütsüogo.

India Electricity Rules 1956 nung EHV lines kübok ki meyanglutsü lateta lir. Anungji kiojen yanglubaji ozüing alema inyakba mapa ka lir aser aji dang masü saka lendong ajurutsü ana nung lir.

Bokajan Assam- Block -II, Burma camp Colony, Block-2,

Walford Colony, Imkonglenden Colony, Mao Colony, Nagarjan, Naharbari nung 132 KV Bokajan-Dimapur line anasa kiojentem aika yanglur anungji iba mapa noktanger, ta Dimapur DC Rajesh Soundararajan, IAS-i sangdong ka nung metetdaksü.

Kija mesüra telok kari EHV lines kübok kiojen yangluba ajanga lendong ajurura, iba tebilemtepa khuretji pei sasa dang abentsü, ta Rajesh Soundararajan-isa metetdaksü.

Dimapur CSOs Core Committee-i public sentong ayonga agiogo



October 5, 2021 nü Dimapur nung aliba Civil Society Organisations Core Committee-i Deputy Commissioner office belena meyoktsü atema public rally ka ayonga agidang tangokba noksa angur. (Dimapur, October 5)

Dimapur, October 5, 2021 (TYO): Dimapur nung Civil Society Organisations Core Committee-i Mongulbarnü public rally ka ayonga agiogo.

State sorkari mapang atakzüksüba tsüingda mapa meinyakba atema Core Committee-i iba sentong ayonga agi.

September 29, 2021 nü Dimapur nung aliba CSOs-i Chief Minister dang anogo pungu tsüingda nung September 7 Home department sangdong meyipa agitsü atema mapang atakzüksüba liasü.

Iba sangdong ya Dimapur nung aliba Deputy Commissioner office Chümoukedima-i belentsüba indang tetuyuba liasü.

CSOs-isa sorkar dang Dimapur DC indang letter head nungi "HQ: Chümoukedima; Camp: Dimapur" agientsü atema takhangba agütsü.

Mongulbarnü nisung noklang aika adenshi aser parnoki Dhobinalla adena Holy Cross junction nungi Deputy Commissioner indang office tashi tetsüing agi jaja orr Dimapur

DC nem tezüluba ka agütsü.

Nisungtemi "Listen to the people", "Listen to the voice of the people", "Democracy listens to common voice" amala züluba placards aser banners amer shilem agi.

"Deputy Commissioner indang office belenba ya kin onük ka masü kechiyong kin ajak kasa dang lir" ta tanü CSO, Core Committee, Convenor Kuhoi Zhimo-ia shi.

"State sorkari iba onük atema mapa meinyakra Core Committee-i Home Ministry nem memorandum ka agütsütsü sentong lir" ta paisa ashi.

"Shisaliok rejutem aser ketdangsubaren sendaktepa lir anungji DC office belenba ajanga kaketshirtemi tetsükdaksü ajuruba magizüker" ta Dimapur Naga Students Union (DNSU)-ia metetdaksü.

Külen, Eastern Naga Peoples Organisation (ENPO)-i CSO Core Committee-i akhangba pusema nungitba metetdaksü.

"State sorkari Dimapur nung alirtemi aginüba mangashir. Nübertemi mapang shia ola

adokaka aser takhangbatem agüjaka sorkari mangashiba aser mapa kecha meinyakba atema aitsür. Dimapur district nung alirtemi aginüba ama sorkari mapa inyaksü mepishir" ta Dimapur nung CSOs-i sorkar dang shidi zülü.

Nagaland sorkari Deputy Commissioner Office complex tasenbai branches/ cells kar belentsü tuyuba anema September 30 nü CSOs-i Dimapur nung ghonda 12 shishilembabaren shibanga jashiba sayuogo.

"State sorkari tang aliba D.C Office Dimapur nungi branch mesüra cell ka danga tangaleni belena maotsü mepishir. Iba mapa inyakba mapang koda masüba tensa ajurura iba tebilemtepa Chief Minister-i abentsü" ta tanü Media Cell, CSO Core Committee-ia sangdong ka nung metetdaksüogo.

"Tanü Dimapur nung sentong agidak shilem agir ajak dang kanga pelar aser maneni tarutsü nunga renema alitsü mepishir" ta CSO Core Committee-isa shi.

Shamator-Chessore by-election nung UDA-i NDPP yaritsü

Kohima, October 5, 2021 (TYO): October 30, 2021 nü 58-Shamator-Chessore by-election nung Nagaland nung United Democratic Alliance (UDA)-i NDPP nem maongka agütsütsü telemteba agiogo.

MLA aser Advisor Toshi Wungtung ajungbena asüba ajanga iba menden tazüing aküm.

UDA nung NDPP, BJP, NPF aser Independent MLA ajak dena lir.

Naga People's Front (NPF)-i sorkar nung adenba ajanga United Democratic Alliance

(UDA) kümtet aser tanü senden nung NPF aser BJP tebilembatem angadanga liasü.

NDPP-i by-election nung candidate meshimtsü mepishia shidi ka züluba sülen Mongulbarnü NPF indang Working Committee rongdak senden ka Kohima nung amen.

Iba senden nung NPF working committee-i tatsü-talang ajak jembir NDPP candidate pusema nungitsü lemet.

58-Shamator-Chessore by-election nung NPF tenüng nungi toktepnüa aliba candidate

Rukkimong-i party telemteba molunga agizükba atema NPF-i pa dang pelaba metetdaksü.

"Taruba by-election nung BJP-i NDPP candidate pusemtepa telemteba agiogo" ta Deputy Chief Minister aser BLP leader Y Patton-ia shi.

Nagaland Legislative Assembly nung züngsem ajaki NDPP candidate pusemtepa bangzüngtepa, candidate tenüng ano mesangdong lir. Külen, 58-Shamator-Chessore constituency nung nisung kari independent candidate ama tokteptsü sentong atonger.

NHIDCL ajanga Nagaland Police nem ambulance pezü agütsü



Dimapur, Mongputeni/Oct. 05 (TYO): National Highways and Infrastructure Development Corporation Limited (NHIDCL) ajanga Corporate Social Responsibility (CSR) kübok Nagaland Police nem ambulance pezü agütsü, koba October 1, 2021 nü PHQ nung agizüka liasü, ta sangdong ka ajanga ashi.

Director General of Police Nagaland ajanga item ambulance ya Executive Director, NHIDCL nungi agizüka liasü.

Item ambulance ya tajungba lir

asert yangji nisung takum timtem nung alidang yaritsü hadir balala inoka lir. Ambulance shia ya oxygen cylinder, manual resuscitator, electric portable suction aspirator with airflow, automatic external defibrillator, BP/heart-rate aser saturation monitor aser danga osettem lir, ta osang ajanga ashi.

Nagaland Police atema iba ama mapa tajung inyaksüba asoshi DGP Nagaland ajanga NHIDCL dang pelaba lemsatapa liasü. Item ambulance amoktsüba mapang

sentong tatsüka agidang Executive Director, NHIDCL, M.S Deol-i state nung nüburtem temaba jenjangi ajungketsü mechi NHIDCL ajanga maparen balala inyakba indang lemsatapa liasü.

State nung National Highways nung tetsür aser tanurtemi amshitsü atema metzü meshiba tesentem yanglutsü atema jembioigo aser NHIDCL ajanga Nagaland Police indang ali nung nüburtem amshitsü atema metzü meshiba tesentem yanglutsütsü, ya paisa metetdaksü.

Kiphire nung 'Hollow Brick' yangluba unit ka semzükogo

Dimapur, Mongputeni/Oct. 05 (TYO): Deputy Commissioner & Chairman, District Level Coordination Committee (DLCC), T. Wati Aier ajanga Kiphire nung October 5, 2021 nü Hollow Brick manufacturing unit ka semzükja liasü.

Iba sentong nung jembiba mapang, 'Kiphire District ya kanga tia taka lir, kechiaser state sorkari aluyimba, horticulture, LRD aser cooperative department densema wadang balala nung yimtsüing sasep nung densema nüburtem yarir,' ta ashi.

Pai Lanya Society dang iba maongka ya agia tentung tajung bener arutsüsa nendaka inyaksü ajungshia liasü.

Nüburtemi tali meshitsü atema Aier-i iba tesem nung yangluba longru (bricks) ya danga tesem nung anguba den medemdangtsü aser jenjang tajemba nung ayoktsü ajungshia liasü.

Pai parnok dang parnok

project nung rangloksü aser khen atema inyakba map aka ama meblemetsü saka nüburtem asoshi tenük lapokba mapang ka amai bilema inyaksü ajungshia liasü.

SRCS & CPO (ICDP), K. Lirichum Anar ajanga sentong nung jembiba mapang, National cooperative development cooperation ajanga Kiphire district nung Department of Cooperation-i 'central sector integrated scheme on Agricultural cooperation of integrated cooperative development project' tem inyaker, ta ashi.

Department-i Hollow Brick manufacturing unit atema sen lakh 4 teyari agütsü aser Lanya multi-purpose cooperative Society Ltd. Kiphire dangi osettsüet belener aotsü atema Pickup gari alitsü atema sen lakh 9.50 agütsü, ta pai ashi.

Iba tesem nung yangluba longru ya tematsük, timtem maliba, anepalutsü temela, kanga

jungba yangluba, amshitsü temela aser arishi talang alitsü, ta pai ashi.

Longru yanglutsü atema anogo 28 shi agir, anogo ka tema nung anü wanga ayutsü, anogo tenet tzü nung ayutsü aser anogo 21 tzü nung tera metena ayutsü, ta Anar-i ashi.

Sen apua aliba mapang shidak nung menoktsü atema society dang iba mapa meranga inyaksü ajungshia liasü.

"Coming together is the beginning, sitting together is the progress and working together is the success" omen nung ajemdaker society yagi meranga inyaksü aser district nung danga cooperative society atema tatishitsü tajung sayutsüla, ta paisa ashi.

Iba unit ya Cooperation Department ajanga Integrated Cooperative Development Project (ICDP) Kiphire kübok Lanya Multi-purpose Cooperative Society Ltd nem teyari agütsüba alitsü.

NSCW ajanga Tuensang nung awareness sentong ka ayongzük

Dimapur, Mongputeni/Oct. 05 (TYO): Nagaland State Commission for Women (NSCW) ajanga National Commission for Women (NCW) den teyaritap nung Changsao Thangjam Setshang (CTS) den lungemer Tuensang Town nung September 30, 2021 nü Domestic Violence indang legal awareness seminar sentong ka ayongzük liasü.

Sentong tenzükä NSCW züngsem W. Nginyeih Konyak-i jembiba mapang, maksü aser tanur magishitsü tetsübu nung domestic violence (kilung nung azüdokshiba) ken o temai madoker aser azüdokshi tamajungba akumdang mesüra

kanga sashia yirudang mesüra asü-ama ajurudang ang police dangi abener, aser item ken o bushisüngdanga o bedang agütsüba nung mapang agir, ta ashi.

Pei temeden tali tejangjaba nung metetdaksütsü aser lendong nungi jembua alitsü mechi National Commission for Women, Delhi ajanga sponsor süa Nagaland State Commission for Women-i iba seminar ya ayongzük liasü.

Iba sentong nung lokti tent balala, ozüing tsütsü takotet nisungtem, police, tazünger-tashirtem, tribal hoho, civil society aser nüburtem dena liasü.

Iba sentong mezüngbuba

noklem nung shisalen sayur ya DWO Office, Khengo liasü aser tanabuba session nung Panel Lawyer, TDLA, P. Herola ajanga 'Protection of women from domestic violence' onük nung jembiba liasü.

Officer-in-Charge, Women Police Station, Tuensang, Chillum-i 'Role of Police in dealing with Domestic Violence' onük nung jembiba liasü. Iba sentong nung NSCW züngsem Chongliu menden liasü.

NSCW team ajanga Tuensang District Hospital, Women Police Station, Sakhi -One Stop Centre aser District Jail semdanga yangji alirtem den sensaksema parnok jenjang asadanga liasü.



Kohima Law College puri küm shia adokba magazine October 5, 2021 nü college nung sayaogo. Iba magazine ya Asst. Professor & Teacher In-charge of Students' Welfare Kezhokhoto Savi ajanga college principal asür Visevonuo Bebi Tsiirho nem akum agüja sayatsü. Iba sentong nung lai college asoshi mapa tajung balala inyakba bilemteta liasü.

BJP sorkari taka-taiter kar atema dang bilemtsür: K Therie

Dimapur, Mongputeni/Oct. 05 (TYO): Uttar Pradesh October 3 nü aluyimer temi longkak aitiba mapang nisung ti takum samatsüba atema Nagaland Congress tir K Therie-i aitsü aser BJP sorkar indang yimya ya India senso ajungai aitsütsüla, ta ashi.

Dimapur nung osangbener den jembiba mapang Therie-i ashiba agi, longkak aiter ta metetaka Union Minister of State for Home, Ashish Mishra'er jabaso aser par teloki gari agi longkak aiter dak menünga aluyimer takum samatsü.

Union Minister aser BJP sorkari iba tatalokba miimbanga ayutsü meranger. BJP-i ajak

miimbanga yutetsü, kechiaser parnok dak nübur atema bilemtsüba mali, ta Therie-i ashi.

BJP-i teti iba ama metetsümonga mapa tamajung inyaka arur. Iba amala tatalokba ya nübur ajungai aitsütsüla, ta ashi.

Tanü Farmers Bill ya billionaires ishikati jangraba ama benoka lir, shirnoki market ajunga amokbanga aluyimer jenjang tamajungbai yoker. BJP yimya ya nüburtem asoshi masü saka taka-taiter ishika atema lir. Parnoki dangar dak aria meblememer saka asenok meimchir-ibo aria bilemer, ta pai ashi.

Nüburtem takum asoshi Congress party-i süoki ia bilemtsür, ta Therie-isa ashi.

Security Forces temi Dimapur nung FGN züngsem pungo apu



Dimapur, Mongputeni/Oct. 05 (TYO): Security Forces October 1, 2021 nü general area Purana Bazar, Dimapur nung operation ka agiba mapang FGN züngsem pungo pua liasü, ta sangdong ka ajanga ashi.

Osang tejangja ka nung ajemdaker Security Forces temi State Police den lungjemer iba

operation ya agiba mapang FGN züngsem pungo ya apu aser parnok ket nungi Pulsar bike ka den ozüing alema saruba sen 20,000 nguteta liasü.

Iba ken o maneni bushisüngdangtsü atema pua alirtem den parnok ket nungi ngutetba osettem ya East Police Station, Dimapur nem agütsüogo, ta sangdong ajangasa ashi.

Kohima nung gari jajatsü atema totuyuba kar agütsür

Dimapur, Mongputeni/Oct. 05 (TYO): India indang Vice President, M. Venkaiah Naidu-i October 7 nungi October 9, 2021 anogotem Kohima semdangtsü aliba ajanga gari jajatsü atema totuyuba kar agütsür:

7th October 2021.

- Item lenmang tezülen gari anena ayutsü memelar:-
 - 1 AR Camp Gate 'D' block nungi Raj Bhavan via TCP Gate, Classic Point.
 - TCP Gate nungi Razhu Point.
 - Razhu Point nungi High School.
 - Classic Point nungi Pheema village via Mhonkhola, Lerie.
- Item melena gari anena ayutsü ya Old MLA Hostel Complex, Northern gate via Razhu Point nung angutsü.
- PHQ lemjem nung aliba bus stand ya NSF Martyrs Park jakdangi belentsü.
- Southern Angami leni aoba Taxi stand Mhonkhola nung aliba ya anüngdang 12:00 ako tashinung azüngtettsü.
- Network Station Phoolbari nungi district alema aoba bus

ajunga anüngdang 12:00 ako tashinung ayamesotsüla.

8th October 2021.

- Item lenmang tezülen gari anena ayutsü memelar:-
 - Raj Bhavan nungi Phoolbari.
 - Phoolbari nungi 1 AR Camp 'D' block via D.C Kohima Office.
 - Phoolbari nungi State Museum, Bayavu Hills via Razhu Point.
- Item melena gari anena ayutsü ya Old MLA Hostel Complex, Northern gate via Razhu Point nung angutsü.

9th October 2021.

- Item lenmang tezülen gari anena ayutsü memelar:-
 - Raj Bhavan nungi Phoolbari.
 - Phoolbari nungi Razhu Point.
 - Phoolbari nungi 1 AR Camp 'D' block via D.C Kohima Office.
- Item melena gari anena ayutsü ya Old MLA Hostel Complex, Northern gate via Razhu Point nung angutsü.

October 9, 2021 anepdang 6:00 ako nungi aonung 9:00 ako tashi gari tulu kata Kohima jila-i aitsü aser jila telung nung senzitsü memelatsü.

Athuan Abonmei tepsetba atema ghonda 24 mokdang



Guwahati, October 5, 2021 (Agencies): Hombarnü Manipur nung Joint Action Committee (JAC) ajanga ghonda 24 mokdang ayonga agiogo.

Athuan Abonmei nem temeten agütsüsü takhangba agütsüba Manipur sorkari meinyakba atema JAC-i mokdang ayongzük.

Lokti atema inyaker Abonmei ya September 22 nü

pur or tepset. Yashi mokdangba nung nisung ajaki shilem agi. Tang mezüing atema Manipur nung lenden aser tenem nung alir ajaki longjemer iba sentong nung shilem agi.

Abonmei-i telongjem aser tenem o lendenlen alirtem külemi putepa liyonga aotsü atema inyaker aliba teloktemi shia JAC-i ayongba mokdang nung shilem

agi. Tesüüba nung lungkak aitba sentongtem ayonga agidang lendenlen aser tenemlen alirtem tsüingda amalitep makai dang aru.

Mokdang ayonga magidaksütsü atema Deobar nikongdang Chief Minister N. Biren Delhi nungi meyipa aruba sülen JAC lenirtem den ajurutep saka pai parnok memesüzüktem.

Assam MLA Ahmed anogo ananü police ketnung ayutsü

Guwahati, October 5, 2021 (Agencies): Guwahati nung okadak kati Mongulbarnü Congress MLA Sherman Ali Ahmed anogo ananü police ketnung ayutsü temelaba agütsü. Dispur police-i Honibarnü pa apuba sülen Baghbar MLA Ali-i anogo ananü tashi police ketnung liogo.

1983 küm Assam Agitation mapang Darrang district nung Assamese lanur 8 tashi tepsetba mezüingmeshia jembiba atema pa Dispur nung apu.

Sherman Ali Ahmed-i anogo ananü police ketnung

ayuba sülen Guwahati nung aliba Kamrup CJM indang court tsüingdangi pa anir ao. Tanü pa forensic laboratory-i anir oa voice sample indang recording süogo.

MLA Ali-i videoa nung olen kar jembiba den voice sample metemdangtsü.

Hombarnü Assam Pradesh Congress Committee (APCC)-i Ali Ahmed party nungi anentsüogo. Pai party inyakyim alema kanga aibelenba atema party nungi anentsü.

APCC president Bhupen Kumar Borah-i Ahmed anentsüba tetuyuba agütsü.

Assam police DIG Rounak Ali Hazarika apu

Guwahati, October 5, 2021 (Agencies): Mongulbarnü Chief Minister indang Special Vigilance Cell-i Deputy Inspector General (DIG) Rounak Ali Hazarika apu.

Mapa nungi anenja aliba IPS ketdangsur Hazarika ya par kidang lia apu. Pai pa dak malangba rongsen bendenba atema tai tonglokja apu.

SP Rosie Kalita-i anir CM Vigilance Cell telok kati

Guwahati kübok Rupkonwar Path nung par kidang apu.

Hazarika ya DIG (border) inyaka liasü saka 2011 nungi pai temelaba magii bendang linüktemi kanga aoba atema tai tonglokja mapa nungi anenja liasü.

Hazarika-i 1992 küm Assam Police Service (APS) nung inyaksü tenzük aser iba sülen IPS jenjang nung ajungket.

Arunachal nung NSCN (R) züingsem ka temai adok

Dibrugarh, October 5, 2021 (Agencies): Hombarnü Arunachal Pradesh nung NSCN (R) züingsem kati Tirap Deputy Commissioner tsüingdang temai adok.

Iba nisung ya private Telom Hangsik (25) ta jangjaogo aser pa ya Lazu circle nung Old Kothung nung lir. Pai DC Taro Mize aser 6 Assam Rifles

tsüingdang temai adok.

Telom Hangsik-i pistol (.32) ka, live ammunition ka aser magazine ka bener arua agütsü. Pai May 2017 nung NSCN (R) nung züingsem aküm.

Tawa tu Assam Rifles indang Khonsa Battalion tsüingdang telungpur telok balala nungi züingsem 10 tashi temai adoka liasü.

Assam nung TET tesayur 5 apu; Taila TET kulikaket atema Rs 1 lakh agütsü

Guwahati, October 5, 2021 (Agencies): Assam police kübok Hajo unit-i Mongulbarnü TET (Teachers' Eligibility Test) tesayur 5 puogo.

Parnokji Dildaar Hussain, Muktaar Ali, Akras Ali, Ajmul Hoque aser Najammuddin Ahmed nung ta jangjaogo.

Parnoki tim masüba inyakyim ajanga mapa anguba atema tai tonglokja apu.

Par punguprong Hajo police ketnung lir aser asüingdangya südar.

Assam police Crime Investigation Department (CID)-i TET tesayurtem anema mapa ka inyaker aser tang tashi nung tesayur 25 tashi puogo.

Tiyongtsü nung inyaker temi taila TET certificates yanglutsü atema sen lakh kaka (1) meshi ta tesayurtemi nangzükogo.



Assam kübok Karimganj district nung apu ka chirepdang kaketshir 30 tashi yiru. Iba lendong ya Cheragi anasa Hombarnü atalok. Singla ayong temdangba yangluba apu ajanga Cheragi tesem den sendakteper aser kaketshirtemi küm aika iba apu ajanga senzür. Hombarnü Cheragi Vidyapith High School kaketshirtem apu adena süidang ajungbena apuji chirep. (Karimganj, October 5)

GOVERNMENT OF NAGALAND
DIRECTORATE OF YOUTH RESOURCES AND SPORTS
 NAGALAND: KOHIMA

NO. DYRS-Acctts-Tourn/KI/2018(Vol-II)9098 **Dated, Kohima the 4th October 2021**

PRESS RELEASE

The Department of Youth Resources and Sports invites interested Girl's Footballer for trails in U-16 Category for Khelo India Centre Football Academy (Non-Residential) at Indira Gandhi Stadium, Kohima. Candidates born after 01/01/2005 are eligible for the trail and must produce age proof certificate i.e. Aadhar/Birth Certificate at the time of trail. The schedule date for trail will be on the 19th October 5, 2021 at IG Stadium from 9:00am onwards.

Candidates may contact at 9862835381 for further information, Application form can be downloaded from www.dyrs.nagaland.gov.in

Sd/-
AKUMLA CHUBA, NCS, DIRECTOR

Issued by DIPR

GENTS & LADIES WEAR MULTI BRAND READYMADE GARMENT SALE **ONLY 4 DAYS**

Due to the Recession after the Lockdown, all the wholesale Shops of Readymade Garments. Had to be close down. Due to Gents and Ladies wear Readymade Garments items offer...

FLAT 80% DISCOUNT

That is those sold from ₹ 999 to ₹ 1999
Now you can buy Gents & Ladies wear Readymade Garments for.....

₹ 250/- Only

Like:- Jeans, Trouser, Chinose Pant, Cargo Pant, Cotton Shirt, T-Shirt, Bermuda, Capri, Girls Top, Plazo, Lower, Ladies Jeans, Jegginge, Payjama, Sport, T-Shirts, Full Sleeve T-Shrit, Polo Strip T-Shirt, Ciffon Girls Top, Skirt, Mens Cotton Shirt and more than thousands of varieties you can buy for.....

₹ 250/- Only

Sale only 4 days - 06, 07, 08, 09 October 2021
 Wednesday, Thursday, Friday, Saturday (Time :10 am to 7 pm)

VENUE: CEDAR HOTEL

Opp. Commissioner Office, Near Nagarjan Police Point, Kohima Road Dimapur - 797112 : Nagaland.

Self Sanitization Compulsory, Without Mask NO ENTERY

ENTRY FREE **PARKING AVAILABLE**

Want Sales Girls
 Contact No. 9643086668.



TIR YIMYIM

YIMOBILEM (EDITORIAL)

DIMAPUR RASEMNÜ, MONGPUTENI(OCTOBER) 06, 2021

Mitkartemi junga inyakdagi

Nagaland ajanga ozüngi memelaba oset aser machimajemtsü anogo shia bener jajaya alitsü saka khen khen Assam Rifles purtemi yi apuba osang dak alaka asenok liso mitkartemi ozüngi memelaba oset aser machimajemtsütem apuba osang kangabo mangshii lia, yashi yakanü Manipur nungi adoklen Kohima district kübok Khuzama süngküm nung Narcotic Cell nung inyaker mitkartemi sen crore 23 shi jenjang hon long apuba den ano shibelener nisungtem balala nungi ozüngi memelaba mozümora heroin aser kani apuba osangji Nagaland nung mitkartemi, parnok tongpang nung, Naga nunger asoshi takok anguba osang tajung ka asütsü. Atangji, ozüngi memelaba mapa inyakerem aputsübaji mapa temela masü aser parnoki abenba oset aser mozümoratem putettsübaji mapa kanga tasak. Itemji lendong nisung lir, anungji tapua kanga kümdanga aputsüla aser ano parnoki mitkartem sen agi mesüzüksü merangtsü, anungji tasütait aser ochishir mitkartemi dang parnokji putettsü. Ashiko, tangjia ozüngi memelaba oset aser machimajemtsü abenertem jagi mitkartemji mesüzüksü meranger alitsüa akok, saka mitkartemi pei kija ajangzüksü mebilemi pei lima aser nübortem kümzüksü bilema ozüng raksaba mapatem anema tasü itta nokdaktetba asoshi kanga pelar. Asenok tamakok dang masü tarutsü putu dena akoksadaksütsüsa inyakba mapa kaji, asenoki ozüngi memelaba machimajemtsütem meteta shibelendaksür aser repranga yokdaksür, iba jagi ozüng raksaba mapatem mazüoktetter. Iba amaji asenoki metetsümonga ozüngi memelaba mapatem inyakdaksübji kanga tsübua aser arendaka bilemstüla, kechiyong yangji asüng asen chirnurtem taküm raksatsü kecha meteta maka. Shiba südir süang, chirnurtem taküm raksarbo tashi kadang rongsen bendenba ajak amajok kümadoktsü. Iba tangatetba nung, tanübo, Nagaland nung mitkartemi ozüng raksaba mapatem anema inyaksü tashi itshiba angudang, memenui Nagaland nung lanur tanishir aser mapa inyakerem tajung aika adoka nükla nung angur. Tanü Khuzama nung mitkartemi ozüngi memelaba oset aser machimajemtsü Nagaland-i bener maitdaksüi nokdangtetbaji Nagaland asoshi dang masü saka linük asoshi takok tuluka asütsü. Tang ya balaka, Assam nunga ozüngi memelaba oset aser machimajemtsü shibelenba anema state sorkari kanga sashia inyakba asenoki anogo shia angashir. Aji oda, Nagaland aser Assam nung mitkartemi tang amai ozüng raksaba mapatem anema takok ngua nokdaktet nungbo, Northeast nung lanurtem aika meteta aser memeteti tajung kümer alitsü. Asen kidanger Manipur lima ya tajunga tamajunga alimai meteta adokdak lima ka lir. Iba lima nungi adokba tekolok techira tashimetettertem alima sünga lir aser asaya tapu balala nung alimai metettsüsa nungtugu asayartem adokba asenoki angur. Soruchioka parnoksa tajungba, süoshia parnokisa tajungba arer, noksaa parnokisa tajungba yanglur aser gari anitsü aser yanglushiba mapa nunga parnok madoksar. Ano külen, Manipur nung telong nung alirtem telok aika lir aser asenok asoshi ajak dang tamajungtibaji ozüngi memelaba machimajemtsü aser osettsüset ajak Manipur len nungi adoker. Aji oda, asenok tia majung kaji, asenoki kidanger nungi mapa tajungtemji masü saka tamajungtemji dang angazüktetter, ibayongji Nagaland nungi alimai metettsüsa maparen tapu balala nung, Manipur nunger amaji, nungtugu nisung adoktsü melen ozüngi memelaba mozümora ayoker aser achirtemang talubosa adoker aser ozüngi memelaba oset aser prangpong injang shibelentsüang angazüker. Iba jagi, Manipur len nungi aruba ser nung, Nagaland nungang poktetba ama drugs aser prangpong injang shibelendakbo Nagaland-ang kümogo. Iba jagi Nagaland nung lanur taküm aika raksadagi aser alima tsüngdang Nagaland topur kanga majung kümogo. Iba ama asenok taküm aser tenüng menentsütsüsa kidanger state nungi aruba mapatem den anogo shia raratsübaji mitkartem asoshi tebilemstü tulu lir. Iba tongpang nung nokdaksü asoshi tasütait, sübokrem menükshiba aser sen masü saka nübortem meimba yimsüsür, lenir aser mitkartem nungdaker. Item ama tetsü taso lima meimba mitkartemji Khuzama süngküm nung ozüngi memelaba oset aser machimajemtsü apur mitkartemji asütsü. Item ama mitkartem ket nung Nagaland kümzüka lir ta temulung lemtetter.

OLEMSABANG

YIMSÜSÜR

- P.Renthy Jamir

Aor sobaliba nung shirnok dang yimsüsür ta aja aser tanüa shir dang ajatsü. Iba onük ya lanur aikati metetnüa asüngdang nung ni angatetba Aori shirnok dang yimsüsür ta ajaba tanü tashi ajar, iba nung ojang ishika lemsateper.

Tanü asenoki putupur ta teimba amshir. Saka onok tanur asüandang iba melena TATAR ta teimba jembia aru. Ata-a akua aliba agi Tatar ta ajar. Aser kodang Tatar ta angashidir aji mesüng angashi nunga tsübua bilem. Tanep, taonung, ungkilang nung tatar senteper ta angashira yimer ajak tenarong meronger kechi asü, kar dang senchi menchi asü ta anga-ata. Tatar ozüng tsübu agi teti kümdanga ali, tapi agi merarateper, tangar meyong nung mesotak. Oda kidang tanur tamajung tsüraburi ashi manga nunga Tatar nem pur-oa agütsütsü ta amokmeren. Israel nungertema tsüraburi mazüoktetba tanur yimti tambur nem pur oa agüja parnoki lung agi onseta entok, Taza-21:18-21. Tatar ozüng tsübu agi kibong telung nung tashi sünepa aliba agi ozüng raksar, tashi manger bulua mali asü.

Alima otsü zülur Dr. B.B Gosh pai ashiba agi Aor ya Chungliyimti lima A.D. 1070-1100 shi tsüngda lir A.D. 1200 shi nung Ungma bushia adoker alitsü südi. Kümji kwi südir süang saka Aor Chunhliyimti alidang küm 30 shilang putu menden alangtet aser tanü aji maneni benshir. Alima democracy government balala ajak rongnung yimsüsür ajakdang tashi tulutibaji Aor putu menden nung aliba Tatar ya lir. Ano inyakyim tajungtibaji ibai lir. Kechiba tashi tulutiba parnoki temzüng ozüng ajak yanglur (legislature) aji mapa küma bener aor, (executive) aser parnokisa obendanger, (judiciary) kechiba tajungtiba yimsüsür ta ashir, iba menden nung kin tilaba nungi tuluba tashi pei kini nisung tetemsüba shimmer yoker, par kinbo maten ta mali (equal).

Parnok yamaji tashi tulu saka parnok taah kecha maka yim saru parnok tama agütsütsü, yim tongpangi parnok tamsür aitsü, putu atsüngdang longmi sabangi tur aibelenerbo tetsü, tebu ta kecha tejak mereprangi Ak mang süzüka achitsü ta azüngashir asünung teti ochi o bendang agütsütsü bilema yimsü asür. Anungji J.P. Mills shibai "THE AO NAGAS" kaket zülü, pai yamai shia angutsü, "The village elders who are sitting in the judgement are always impartial." Aori yimsüsür ta ajabaji item dang ya ja-a aru aser tanü tashi parnok dang ajar. Anungji lai nunga yimsüsür ta meyipzüka alibatemji kar reprangdangdi.

Rom- 13:1 nung governing authorities/higher power tematiba tashi akartem ta lir yimsüsür.

Api Shin- 31:4 nung Rulers/Princes (a royal ruler) yimsüsür chuba kin. Ano Yob- 29:9 nungbo Chief men/Princes nisung rongnung tokolakba chuba kin chuba senmanger yimsüsür kin ta lir. Kechiyong tapi agi yimsüsür ta majar.

Tanü nübur aikati village council ta asüba ya putu menden den aiteper. Village council yabo Nagaland governmenti küm pungo atema shimmer. The Nagaland Village and Area Councils Act, 1978 chapter I NO.6 (a) nung State governmenti manentsüra parnok shimba anogo nungi küm pungo inyaksü ano atsülangtsü akok ta lir. State governmenti shimmer governmenti anentsütsü akok. Parnok ya governmenti melaba dang inyaksü, temerenshi tulu agütsütsü makok, senchi tulu achitsü makok. Parnoki yimtsüng terenlok mapatem ajaayangtsü saka yimsüsür ta majatsü. Saka Tatarbo yamaji masü parnok shinga kübok masü, saka shitakba yimsüsürtem lir.

Aikati council ta asüba ya yimsüsür tashi abener ta bilemer. Council tetezü meeting ta local ta-ang agüja lir. Tanü asüng town tila nunga nütsüng yongsük yazü tali tapong zülutena yur town council ta town committee ta ano Ward Chairman, All Ward Chairman ta, Senso Executive ta kari aibelena onok yimsüsür ta jembir. Ano Gaon Boratem ya-a government tenyartem lir. Lai nungbo Alimelen sarur publican ta tax collector ta ajar. Parnok ajak

ya lokti tanishir saka yimsüsür masü. Parnoki yimli alanga maka. Ano D.C, S.D.O parnok ya-a yimsüsür tam ajar. Administer to manage carry out yimsüsürtemi ozüng yanglua yutsübatem ajaayanger. Parnok madak ozüng yanglur M.P/M.L.A tem lir. Akidang Aor yim shiaji independent (city state) kaka liasü, Tatartemji ozüng yanglur aji ajaayanger o bendanger parnok madak shinga mali. Anungji yimsüsür ta ja-a aru.

Koda asütsü alimai memoa nübur tia maka tanü asen tendak pei pei kin tebu, tebou aso taren shitepa Tatar menden nung mendaksüba, Ao lima yimtsüng aika nung sangkeni pei nung memetet ama Tatar tashi (power) memeteti alanger atartemi election aru shia Tsünü shishi ama jenjang tuluba rüjia yoktepbu nübur narongi angashir, tenüki angur, kechiyong shiti kolak alu per agi kübanga ayutsü makok. Aser Chungliyimti shilang mesenmetoa Ita, Anü tsüngrem dang azüngashia nangzükba tamakitsü kümdaksür. Joko ita dangbo petinu tejakjaba kümdi ta Senso Executive ta Bendang alir Uniona ta senteper yim dak tebu, tebou menden alanger yimsü asür hau ta mali tashi amshiteper. Yamaji saka Tatartemji itemji aramoka tashi mamshiteti yim dak petsapetperonga yimli tero maket kümdaksür.

Tanü Naga lima teraksa tia ya yanglushidi süra mezüngbuba Ao lima yimtsüng ajak nung putu menden ya tama akimapang amato akhümketa wazüka ayutsüla. Tatar shirnok dang yimsüsür ta ajar parnoki ochi shia yimsü asütsü nübur ajaki nongittsüla. Israel lima asenok ama ya aiatai tia nung alidang tamangertemi, "Alemlia ama ozü anogo tasen kümjangma" ta kibuba dang ayimtenba ama arogopurtemi yimsüsür asoshi inyaksüla. Kodang Ao lima nung putu menden akhi ama yangerteta yim ajak lirumedema nüburtemi Tatar yimsüsüba kübok tashi anga litetdir alimaji mejungiang malitsü. Aser Naga nunger ajak Aor jilu ajir asünung Aor melenshiba den külemi parnok melenshitsü.

Lokti tentet tanishir aika rongnungi Aori shirnok dangang yimsüsür ta ajar tang angatetogo. Anungji item yimsüsürtemi pei NÜNGJA angateta nübur madak yimsü asütsü. Nübur ajaki Lai nung melaba ama yimsüsür bangdak tashi anga alitsü süra asen lima mejungiang malitsü ta bilema iba onük tazünger ajak den shisa lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Route 66 'God Loves You' tour nung nisung aikati Khrista agizük



September 19 nü Joliet, Illinois nung Franklin Graham-i "God Loves You" sentong nung lokti den jembidang tangokba noksa nung angur.

October 05, 2021: Sayutsünger, Franklin Graham indang "God Loves You" tour mapang nung nisung meyrjang aikati Yisu Khrista agizükogoo; anogo 14 tour mapang nung osangtajung kentenerem-Newsboys aser Marcos Witt nungeria shilem agia liasü.

Nüngtugu sayutsünger, asür Billy Graham'er jabaso, Franklin Graham-i iba tour kübok yimti 8 nung sayutsüngia liasü. Franklin ya 2001 küm nungi Billy Graham Evangelistic Association (BGEA) nung Tir inyaker.

Route 66 tour ya September 19 nü Chicago nung tenzüka liasü aser Honibarnü San Bernardino, California nung tembang. Item sentong nung nisung 56,000 dak tema aden aser nisung 5,000 dak temai tang mezüng Khrista nem taküm bendanga agütsüogo, ta Billy Graham Evangelistic Association (BGEA) nung otongdari metetdaksü.

San Bernardino nung tatembangbuba sentong agia liasü aser iba sentong nung nisung timba dena liasü.

Samaritan's Purse nung tongti, Franklin-i, "Hopta ana tejaklen onoki Route 66 nung God Loves You Tour tenzüka liasü aser America tiyongtsülen aliba yimti 8 nung osangtajung prok," ta metetdaksü.

"Taonung San Bernardino nung tatembangbuba sentong agidang ni lokti dang, ni nisung

shinga nem-a yimsü magütsür, kechiyong yimsü ajanga na molumi nungi mekümzüksü ta ashi. Yisu Khrista dang na kümzüksü, ta ni ashi. Tatok meshia Yisu Khrista dangi arutsü aser Pa dak amangtsü melungtetertem dang ni pelar. Parnok atema sarasademsüba nung kü den külemi shilem agiang," ta metetdaksa liasü.

Arrshi küm 69 sayutsünger, Franklin-i 1989 küm nungi tenzüka alima tesem balala nung evangelistic sentong 200 dak tema nung shilem agiogo.

Iba tour kübok September 21 nü St. Louis nung sentong agi, Springfield, Missouri nung Sept. 23 nü, Oklahoma City nung Sept. 25 nü, Amarillo, Texas nung Sept. 26 nü, Albuquerque, New Mexico nung Sept. 28 nü aser Flagstaff, Arizona nung Sept. 30 nü sentong agia liasü.

Billy Graham Evangelistic Association-isa Newsboys, Dennis Agajanian & Witt densema iba tour nung shilem agirtem dang pelaba metetdaksü.

Honibar sentong nungbo Harvest Arogo nung pastor, Greg Lauri aser The Tommy Coomes Band telokia shilem agia liasü.

Yimti 8 nung Arogo 1400 nungi züngsemtemi "God Loves You" tour nung shilem agia liasü. Item Arogotemi maneni tour mapang Khrista agizükertem atema sentong katsütsü.

Franklin-i, "Tensa

mapangtem melenshir, sobaliba melenshir saka nisungtemi Khrista ajanga Tebu den tesendaktep ayutsü nüngdakbabo kodanga memelenshir," ta ashi.

"Tanü asen meketa osang tamajung jenti aliba mapang nung nüburtemi teimla nüngdaker. Ni Route 66 nung alirtem aser iba linük nung alirtem nem 'Tsüngremi nenok meimer' ta metetdaksüner," ta paisa ashi.

Tawa interview ka nung Newsboys telok nung tongti kentener, Michael Tait-i lanurtem den osangtajung lemsatepsü jangraba lemsatepa liasü.

Paisa, "Onoki 'Won't Be Afraid' ta ser ken ka record süogo. Yihusua 1:9 nung Tsüngremi Par nüburtem dang tsübu malitsü tuyur," ta ashi.

"Tasü itta alitsüla. Metesübuttsüla. Asen aolen ajak Pa asen den lir. Tsüngremi ajak aziöker ta asenoki metettsüla, kechiyong kodang aseni aziöker ta bilemdir idangji tetsübu aitadoker aser na ashioktsür," ta Tait-isa metetdaksü.

"Asenok tetemsü masü. Asenok dak metokmeperi lir. Ajisüaka metokmeperi nungji osang ka lir, aser iba atemaji Tsüngrem dang pelar; iba osangji "Tsüngremi na meimer' aser Tsüngremi tai atoker. Anogo shia Pa taochi ajanga ni ajungmesor," ta paisa shisem.

ANOGO ABEN TSÜNGREM DEN

Metongshitsüba nung anisüngzük

"Ne jabaso metongshiang, aser pai ne nem anisüngzük agütsütsü. Hau, pai ne mulung nung tepela agütsütsü."

A. Shin 29:17

Meimchir rongnung shinga tabensaba mali ta ajaki jembir, aji alimai au ta agizüketba ochi o lir. Tsürabur shibai pei chirnur nem temetongshiba agütsütsü meteta kar ibaji senzüka toktsür, pai/lai pei jala-jabaso metetsümonga ongken taroki yokba den saku.

A. Shin 19:18 nung yamai ashir" teimla alidangji, ne jabaso metongshiang; saka pa samatsütsü nai tebusi."

Tanü Khristan kibong aika nung tsüraburi pei jala/jabasotem nem temetongshiba agütsütsü tsübur, ano kari metetsümonga majung ta meteter toktsüba ajanga tanur taküm nung teraksa ajurur külenang tesülen sasaseta aliba aika angur. Tsürabur shirnoki mapang shitak nung pei chirnur nem temetongshiba agüja aru, par taaji chirnurtemi taküm nung nüngdakba ajak nung teyari agütsüba ajanga anisüngzüka alibatem aseni ngua arudar.

Amangbapurtem, tsürabur tajung ka na aser ni Tsüngremer tesayuba o angaa asen nem moaja akaba chirnur aser semchirtem Kibuba metetba nung metongshia anitetba nung shilem tajung agitetbapur ka asütsü Tsüngrem nungi anogoshia shisatsü meshia lidi arung.

SARASADEM

Temeim Tsüngrem Ne oi melaa aliba ama chirnur aser semchirtem nem temetongshiba agütsür taküm ka ni kümdakjang. Amen

Uttarakhand state nung Hindu nungertemi Tenla ki ka amak

October 05, 2021: Amongnü aputsü atema onoki yasüng (October 3, 2021) nü nungi mita odor. Tanünga Uttarakhand nung aliba Tenla ki nisung 150-200 maitsüa ka nung tekülem setong tagidak jangjatsü atema onoki mapang nung nisung 200 shi merangdar," ta metetdaksü.

arua timtem agütsü aser Rookee yimti nung aliba Khristan pongu yirutsüogo, ta Arogo lenirtemi metetdaksü.

Hindu yimsü alia amangertem jagisa Hindu nungertem Tsüngrem Ram tetshia Tenla kidang furniture, noksatem aser kongki tapu balala raksatsü, ta parnoki metetdaksü.

Osangbener den jembidang police ketdangser, Vivek Kumar-i, "Aibelenertem lenir

Arogo nungji pastor, Priyo Sadhna Porter-i, Tenla ki amakertemji lai aika meteta lir, aser parnok timbaka Bajrang Dal züngsemtem lir, ta metetdaksü.

Taküm küm tetenzüklen nungi Chhattisgarh aser Madhya Pradesh na densema tribal nütsüng aika aliba state tem nung Tenla ki aika maakogo.

ICC-i Tajikistan dang Khristan Refugees atema arrtsü lapokjang ta mepishi

October 05, 2021: Tang tamangba yimsü mashie Tajikistan aser Afghanistan na amangtsü mesüra mamangtsü arrtsülen International Christian aser yimsü dak sendakba Concern (ICC)-i Afghan sentongtem nung shilem agitsü Khristan refugees tem kümzüka asoshi nisung ajak nem temeden Taliban nungi jendaktsütsü agüja lir."

meranger saka makoker, ta ICC-i metetdaksü. Taküm August ita nung Taliban teloki Afghanistan agiba sülen Hazaris nung 1000 jungnüa Kabul yimti nungi jena liasü.

Minority Rights Group International-i ashiba agi, küm aika tejaklenbo Hazaris nungger ya Afghanistan nung lisopur telok tulutiba liasü aser parnokji nütsüng shilem 67 shi liasü saka tangbo parnok nütsüng shilem 9 shi dang kümogo.

Afghanistan nung anogo shia Khristantem tetsübu nung dang lidar aser parnok aika atsükadokogo. Ano külen Khristan lenirtemia underground churches nung züngsemtem den tongtepratep mesüteter.

U.S. State Department Iba dak sendakba nung ICC-kübok International Religious Freedom Report ajanga ashiba agi, "Tajikistan ya secular linük ka lir. Linük temzüng kübok

amangtsü mesüra mamangtsü aser yimsü dak sendakba sentongtem nung shilem agitsü asoshi nisung ajak nem temeden agüja lir."

Ajisüaka taküm küm tetenzüklen State Department-i Tajikistan ya Country of Particular Concern (CPC) nung züngokogo, kechiyong iba linük nung religious freedom anema inyaker.

Ajisüaka osang angazükba agi, Afghanistan nung Taliban telok dang nungi ajenerterem nem Tajikistan-i teimla agütsür aser jenokdaksür.

Taliban teloki Afghanistan nung tamalen temerenshi tulu agütsüba ama maneni ozüng alema inyakerterem nem temerenshi agütsütsü, ta sangdongogo. Iba linük nung Khristantem timbaka Islam yimsü toktsür Khristan yimsü agizükertem lir, aser parnok aikati temerenshi tulu angutsü ta bilema tetsübu nung allir.

Iba dak sendakba nung ICC-i Tajikistan dang Afghan nungger refugees atema arrtsü lapokjang aser linük nung jenokdakjang, ta mepishiogo.



Model Village Ao Baptist Arogo nung October 2 & 3, 2021 anogotem nung Youth Retreat amongdang agiba noksa angur. Iba sentong ya 'E-God' omen nung ajemdaker agi aser Tsüngrem O jembirji DABA Youth Director, Jongshimanen liasü.


OLONG PAITEP # 5958

1				2				3		4
5		6								
							7			
8										
										9
		10				11				
				12				13		
14										
						15				
16										

TIPLÉN		LANGTSÜNGLEN	
2. Auo nung chiyongtsü asenba - (7)		1. Lenmang - (7)	
5. Mangyimba mapang - (5)		2. Aor kidong ka tenüng - (6)	
7. O tamendakdak - (4)		3. Tenarong maten - (6)	
8. Pei dak malangba - (7)		4. A _ _ _ g - (3)	
10. Juli - (7)		6. Mopung apodoka - (3)	
12. Sen ayudak - (7)		ola adokdaksüba - (3)	
14. Tenük agi ajitet - (4)		9. Tongtipang tagitsü - (7)	
15. Tamajung aküm - (5)		10. Menungra bilem - (6)	
16. Apuso - (7)		11. Aiür - (6)	
		13. S _ _ _ k - (3)	
		14. T _ _ _ r - (3)	

OLONG PAITEP # 5957 TELANGZÜBA

TIPLÉN :		LANGTSÜNGLEN :	
1. Yiar, 3. Tesola, 7. Yimra,		1. Yimti, 2. Amen, 4. Shiner, 5. Alaka,	
8. Tangar, 9. Peria, 10. Tanur,		6. Satan, 9. Putet, 10. Tembar,	
11. Tasen, 13. Lemjem, 15. Tambu,		11. Tatok, 12. Amang, 14. Jala.	
16. Khuret, 17. Sang.			



SANNÜKER ALOKBA ASER MEDEMER SOBANGBA NA SENSAXEMER

Sobangba - Alokba na küm paika pastor mapa inyaker arogobo Tanüla aser alishe kecha nunga meinloker taluang talangka loadokogo joko nai angateta takümbo sodi meshitsüla to

Alokba - Ya nia langka aliba agiang sodi memeshir ako ya, ni asen arogo mapa nungi anenra tanga arogoi mamshitsü, joko ita sen mangutsüji kibonga kanga tim atemtsü, ano ni sodi meshi nung kinüngertemia kechiba masüngdangi sodi meshi ta artsütsü, ita sen tila asünung kinüngtsü o tanur onok ajak suit arba agi kia mesütet talidak kia mali....

Sobangba - Ojang süang Ojang süang ni angatetogo, nai mangatetra asen arogo ana akümstu mesüra Tsüngremi ner kibong ana kümstsütsü ta asü nung dang asen arogo aintsüar na ya sannüker masü sen nüker angar nüburtembo ola madoksür tashi agi metsüdakdarko no oh Alokba

Lilir : Sms

TANÜBO NAI LANGZÜANG

Q. Manipur indang Festival of Dance and Music dang kechi ajar?
A.Nata Sankirtana B.Bhadu C.Naukhai Juhar D.Bihu

(Taruba adok nung onoki langzüksü)

YASHI ADOK TELANGZÜBA : USA

AO OSHI ANGAZÜKDAK:

TANÜ ANGAZÜKTSÜBA OJANG



Langi

(n) langtem soitba lisü (loin cord)

* Tanü putu nungbo belt dang langi ta aja nunga apettsü.

Langka

(adj) kechiar jangjaa mashi (something)

* Tsürabur kidangi aodang langka kabosa bener aotsüla.

NAI-A YA METETTER MA

NETFLIX NUNG SAYUTSÜ ALIBA SHOW ASER MOVIE KAR: OCTOBER 2021

- Escape The Undertaker - Netflix Film
- Bad Sport - Netflix Documentary
- The Blacklist: Season 8
- Love is Blind: Brazil - Netflix Series (new episodes weekly)
- There's Someone Inside Your House - Netflix Film
- The Billion Dollar Code - Netflix Series
- A Tale Dark & Grimm - Netflix Family
- Family Business: Season 3 - Netflix Series
- Pokémon the Movie: Secrets of the Jungle - Netflix Family
- Pretty Smart - Netflix Series
- Insidious: Chapter 2
- The King's Affection - Netflix Series
- Bright: Samurai Soul - Netflix Anime
- Making Malinche: A Documentary by Nacho Cano - Netflix Documentary
- Hiacynt - Netflix Film
- Reflection of You - Netflix Series
- Another Life: Season 2 - Netflix Series
- One Night in Paris - Netflix Film
- The Forgotten Battle - Netflix Film
- Little Things: Season 4 - Netflix Series
- The Trip - Netflix Film
- Victoria & Abdul
- Gabby's Dollhouse: Season 3 - Netflix Family
- Insiders - Netflix Series

(Maneni asüng adok nung...)

SUDOKU # 5999

TELANGZUBA # 5998

4	9	6	1		7	5	9	8	2	1	7	5	6	3	4	
3	5			9	2		7	1	3	4	6	8	5	9	2	
2	7	5			4	9	5	4	6	3	9	2	7	8	1	
			2		5	7	8	7	9	5	4	3	1	2	6	
	1			6	2	9	6	2	4	9	1	7	8	5	3	
7	2		5		4		1	3	5	8	2	6	4	7	9	
8	9		4	7	5	6	2	3	6	8	2	5	1	9	4	7
1	7	3					2	9	7	6	8	4	3	1	5	
		2			3	7	4	5	1	7	3	9	2	6	8	

OJANG LUTEP # 5544

- DAKOKA :
- JBIEMA :
- SONENTG :
- ATTEONGT :
- JIAYONG :
- EMETSÜNGRR :
- NGBMOLUA :
- MRESÜA :
- ILETEBMBA :
- KTSMATALOÜ :

OJANG LUTEP TELANGZÜBA # 5543

KHEN JUNG JUNGA MESHISADANGI INYAKER ASÜDANG TETI ATEMA TERAкса ADOKER

TAN HOPTA ATEMA - KOMA SÜLA ?

Q. Nagaland nung yimtsüngtem kübok aliba ali kimongtem ya bank nung talang yutsür (mortgage) sen aputettsüsa ozüng tasen ka yanglu nunga koma süla ?

Olong 20 shi nung October 08, 2021 tashi nung iba telangzüba ya onok dangi (e-mail - tiryimiyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

FIR mebenoki ghonda 24 dak tema ni sota ayu: Priyanka



Srinagar nung Lakhimpur Kheri nung lendong atalokba anema Congress züngsemtemi placards amer yimyim ayima longkak aitba noksa nung angur. Lakhimpur Kheri nung aluyimertemi ayongzüka longkak aitba mapang nisung ti tepseta liasü.

New Delhi, Mongputeni/October 5 (Agencies): Lakhimpur Kheri nung aluyimer pezü tepsetba nisung tang tashi mapur aser FIR mebenoki la kechiba ghonda 28 tashi sota ayur, ta Congress lenir Priyanka Gandhi-i Mongolbarnü asüngdang. Kasa mapang nung Congress lenirtemi ashiba agi, Priyanka la indang okatsürtem dena majurutepdaktsür.

Priyanka Gandhi aser Congress lenirtem ghonda 24 dak tema sota ayu aser Sitapur nung parnok sota aliba 2nd Battalion PAC guesthouse kolak nung drone camera ka yimzüdaktsüdar, ta Congress ketdangsurtemi ashi. "La

okatsür den ajuruteptsü memelar aser ketdangsurtemi la sota ayuba kuli magütsür," ta Congress media & communication vice chairperson Pankaj Srivastava-i ashi. Priyanka Gandhi dak alia state Congress tir Ajay Kumar Lallu, national secretary Dheeraj Gurjar, Youth Congress national tir BV Srinivas, party MLC Deepak Singh nung sota yua lir, ta pai ashi.

Congress general secretary ya Hombarnü Lakhimpur Kheri-i oya aliba mapang Sitapur nung apu. Taoba küm Centre-i aluyimba ozüng benokba sülen aluyimertemi longkaka ait tenzük aser Deobarnü tatalokba ya

mepetmesü adokyonga aruba rongnung tesashitiba liasü, kong nisung ti asü aser nisung aika yirua liasü.

Mongolbarnü lai Twitter nung longkak aita aliba aluyimertem SUV kati tsükshiba video ka lemsatapa liasü. "@narendramodi ner sorkari ni tetuyuba mesera FIR kecha mebenoki ghonda 28 sota yuogo. Aluyimertem menüngsang kechiba tang tashi mapur," ta ka Hindi agi tweet asü.

Party nung külem tenzükur Gurjar-ia video tanga ka nung Congress lenirtem sota aliba guesthouse kolak nung drone ka yimzüa aliba lemsatap.

(Maneni tapak 9 nung...)

State aser UT tem nem Covid-19 vaccine dose 91.77 cr agütsüogo

New Delhi, Mongputeni/October 5 (Agencies): State aser union territory tem nem tang tashi nung angati Covid-19 vaccine doses crore 91.77 dak tema agütsüogo, ta Ministry of Health and Family Welfare-i Mongolbarnü metetdaktsü.

Ministry-i ashiba agi, Centre sorkari linük ajunga nung Covid-19 vaccine takaratiba nung agütsütsü aser vaccine agütsüba sentong atsülangshitsü bendanga agütsür lir.

asur UT tem nem vaccine dose 91,77,37,885 angati aser direct state procurement category ajanga agütsüogo.

Ministry-isa, Covid vaccine 6,73,07,240 state aser union territory tem ket nung lir, ta metetdaktsü. Covid-19 vaccine agütsüba shilem tasenba ya June 21 nü tenzüka liasü.

Vaccine peria aliba ajanga aser iba den State aser UT temi setong tapet yanglutsü atema jelia vaccine osang agütsüba aser vaccine supply chain

tajungba küma ajungketba ajanga vaccine agütsüba sentong kanga kara inyakyonga odar.

Linük ajunga nung vaccine agütsüjemtsü atema India sorkari state aser UT tem nem Covid Vaccines angati agi agüja nongita arudar.

Vaccine agütsüba sentong tasenba kübok Union sorkari linük nung vaccine yanglurtem ket nungi vaccine shilem 75 alizüka state aser UT tem nem agütsüdar.



Ato Kilonser Narendra Modi-i Lucknow nung 'Azadi@75 - New Urban India: Transforming Urban Landscape' Conference-cum-Expo, lapoktsüogo. Uttar Pradesh Angh Anandiben, Union Minister for Defence Rajnath Singh, Union Minister for Petroleum & Natural Gas, Housing aser Urban Affairs Hardeep Singh Puri aser Uttar Pradesh Chief Minister Yogi Adityanath nungera noksa nung angur.

Amit Shah-i October ita J&K semdangtsü

New Delhi, Mongputeni/October 5 (Agencies): Centre indang mega outreach programme nung shilem ka ama Union home minister Amit Shah-i October ita Jammu and Kashmir semdangtsü, ta sorkar source kati ashi.

Ketdangsur kati ANI dang ashiba agi, Minister-i October 23 nungi 25 tashi Jammu and Kashmir semdangtsü akok.

Ketdangsurisa, anogo ya October 22 nü asepzüka bener alutsü akok saka Minister-i Union Territory ya anogo asem atema semdangtsü, ta ashi.

Jammu aser Kashmir na semdangba mapang Home Minister-i project kar indang nüngshilong azüngtsütsü aser developmental projects kar semzüksütsü. Paisa ken o balala dak ajemdaker senden ayonga amentsü.

J&K semdangba mapang Shah-i, Kashmir valley kübok kinük nung aliba nüburtem den

ajuruteptsü aser pai Jammu-a semdangtsü. Shah-i J&K semdangba nükjidongji terenlok aser tajangzüktek sensaker ket tongdaktsütsü atema lir.

Home Minister-i Jammu and Kashmir semdangba ya Centre sorkar indang mega outreach program nung shilem ka lir, kong Union Minister 70-i Jammu and Kashmir semdangtsü sentong lir. Centre sorkar indang mega outreach program tanabuba shilem ya taküm September 8 nü tenzük aser Home Minister Shah-i semdangba sülen tembangtsü.

Centre sorkar indang mezüngbuba mega outreach program ya taoba küm January 18 nungi 24 tashi agi, kong Union Minister 36-i Jammu and Kashmir semdanga liasü. Article 370 aser 35A aginba sülen Jammu and Kashmir nung tang benoka inyaka aliba project tem asadangtsü nükjidong nung iba sentong ayongzüka agidar.



Nat-3 "Ketdangsurtemi class 1 nungi 5 tashi school nung oa adentsü atema temelaba agütsüba sülen Gurugram nung kaketshirtem temang tendangba noksa nung angur.

Mamata aser TMC MLA 2 Oct. 7 nü tenangzüktepba agitsü

Kolkata, Mongputeni/October 5 (Agencies): West Bengal Angh Jagdeep Dhankhar-i Mongolbarnü, chief minister Mamata Banerjee aser state assembly nung tang züngsemtem tenangzüktepba agiba sentong October 7 nü pai achaayanga agitsü, ta ashi.

Banerjee-i otsüsütsüsa Bhowanipore by-poll vote 58,835 agi akok. La chief minister mapa maneni abentsü atema iba election akoktsü nüngdaka liasü.

Tawa shimba TMC MLA tema Bresthostibarnü tenangzüktepba agitsü.

"West Bengal Angh Jagdeep Dhankhar-i October 7 nü West Bengal Legislative Assembly nung 11:45 nung WBLA nung tawa shimba züngsem; MAMATA

BANERJEE, JAKIR HOSSIAN aser AMIRUL ISLAM nung tenangzüktepba agiba sentong achaayanga agitsü," ta Dhankhar-i tweet asü.

By-poll nung Jangipur constituency nungi Jakir Hossain-i vote 92,480 agi election akok aser kasa mapang nung Amirul Islam-i, Samsorganj constituency nung vote 26,379 agi election koka liasü.

Election osang ya Deobarnü sangdonga liasü.

West Bengal parliamentary affairs minister Partha Chatterjee-i Hombarnü Angh dang Banerjee densema legislator tem tenangzüktepba agiba sentong October 7 nü achaayanga agitsü mepeshia liasü.

Nisung asem nem Nobel Prize in Physics sempet agütsü



Royal Swedish Academy of Sciences indang Secretary General, Goran Hansson (tiyong müketa Nobel Committee for Physics züngsem Thors Hans Hansson aser Nobel Committee for Physics züngsem John Wettlaufer (achichi) nungertemi Stockholm, Sweden nung aliba Royal Swedish Academy of Sciences nung 2021 Nobel Prize in Physics sangdong dang tangokba noksa angur. Taküm Nobel Prize for Physics ya Japan, Germany aser Italy nungi scientist asem nem agütsüogo.

Stockholm, Mongputeni/Oct. 05 (Agencies): Scientist asemi alima indang tzümopung ama tebenja angatetsü asoshi inyakba atema 2021 Nobel Prize in Physics agüja liasü.

Stockholm nung sentong ka agiba mapang Syukuro Manabe, Klaus Hasselmann aser Giorgio Parisi nungertemi iba konang ya ajangtet, ta metetdaksü.

Manabe aser Hasselmann na mapa ajanga alima tzümopung indang computer models agi global warming agi kongshiba takzütet.

Takok angur par asem ya senpet sen £842,611 (10 million

krona) agi sadangtsü. Asenok aliba lima ama tebenja physical systems yimya takzütü kanga tasak lir. Saka computer models ajanga greenhouse gases nungi tango adokba asoshi telangzüba agütsütsü rajemdaksür, koba global warming indang angatetba nung kanga tongtipang liasü.

Syukuro Manabe ya arishi küm 90 lir aser atmosphere nung carbon dioxide tali akumba ajanga ali tema nung temperature tali akumba indang sayutet. 1960s mapang pai anir tzümopung indang physical models yanglua liasü.

Küm ter shi lir arishi küm 89 tain Klaus Hasselmann-i computer model ya yanglutet, koba agi tzüngsang aser tzümopung sendakteptsür. Tzümopung melenshiaka climate models nung komasür tamang katettsü, ta tasüngdangba pa indang mapa ajanga langzü.

Giorgio Parisi indang mapang ajanga 'random materials' aser yimya ajunga angateter aser rasateter, ta committee ajanga ashi. Yangji kanga tebenja aliba microscopic level tashi dena lir.

Pa mapa ya physics kistung nung amshir masü saka mathematics, biology, neuroscience aser machine learning (artificial intelligence putu) amala nunga amshiteter.

November ita alima nung lenirtem UN indang climate conference ka amentsü renemba mapang alima atsükba indang angatetba nung sempet ya agütsür alitsü.

Swedish industrialist Alfred Nobel-i iba senpet ya pa indang rongsen nungi tentettsü, koba pa asütsü küm k alia zülüja liasü. Alfred Nobel ya 1896 küm asü.

Iba physics prize ya 1901 küm mezüng agütsüba sülen tang tashinung nisung 218 nem agütsüogo.

Iba senpet angur ya tetsür pezü dang lir. Physicist John Bardeen-i iba senpet ya 1956 aser 1972 nung ngua liasü.

Philippines tir atema Ferdinand Marcos Jr-i tokteptsü

Manila, Mongputeni/Oct. 05 (Agencies): Taoba mapang Philippines nung dictator inyaka alisanger jabaso Ferdinand Marcos Jr-i taruba küm elections nung tir atema tokteptsü sangdongogo, anungji tir menden atema tokteper nübu tali akumer.

Marcos ya 2016 küm tatong tir atema tokteperba nung tamakok ajuru aser pai linük nung lenirtem lungjemdaksütsü, ta Mongulbarnü sangdong ka nung ashi.

Arishi küm 64 tain yagi COVID-19 tashidak wara ajanga timtem balala agütsür aliba nunga telangzüba agütsütsü, koba linük indang otsü nung tetendangba tulutiba rongnung ka alitsü, ta ash.

"Alima ajunga nung iba tashidak wara poktetba ajanga asen linük nung nüburtem takum, kibong aser kin ajunga samatsü," ta pai ashi.

Philippines nung coronavirus cases million 2.6 dak tema lir aser yangji tasüba nisung 38,000 shi lir.

Marcos dang ya "Bongbong" ta ajar aser 1986 küm tebu yimli laodaksüba sülen pa bendang lima nung jenoka aliba 1991 küm meyipa shilangba sülen yimtenren nung shilem agia arur aser pa ya tir mesüra taong tir atema tokteptsü akok, ta nüburtemi jembia aru. Pa ya taoba mapang provincial

governor, congressman aser senator ama inyakdanga lir.

Iba sülen 2016 election nung pai tamakok ajuru, koba atema pai court tem nunga ken o benoka liasü. Marcos ya social media nung kanga teyakyak ka lir aser pa indang Facebook page kisung nunga pa sülen anidaker million asem dak tema lir.

"Tajung atema nokdakba den nenoka kü den tenangma. Lungjemer tanaben nokdaksü," ta pai ashi.

Pai Mongulbarnü iba osang mesangdong dang pa tembar aser tir menden nungi alutsü alisang Rodrigo Duterte teyari nung tokteptsü akok, ta bilema liasü.

Philippines tir atema yimjak nung tang tashinung sangdonga alirtem rongnung pa ya pezübuba lir.

Manila City Mayor Francisco Domagoso-i Hombarnü tenung agütsü aser iba sülen boxing asayar mongin. Manny Pacquiao-i sangdonga liasü.

Taoba mapang police tanishir inyaka alisang senator Panfilo Lacson ya Duterte melentsü atema tokteptsü tejangraba lir. Duterte ya constitution kübok kümsük tanabuba atema tokteptsü memelar aser yimten yimsüsüba nungi anisungzüksü telemtetba agiogo.

China inyakyim anema kümküma alitsü nungdaker: Taiwan

Taipei, Mongputeni/October 5 (Agencies): China indang military inyakyim anema Taiwan renema alitsü nungdaker, ta Taiwan Premier-i Mongolbarnü ashi. China nung tayimtsü 56 Taiwan indang air defence zone-i aitba sülen iba osang metetdaksü. Premier-isa par linük kümzüka ayutsü atema kechi südir süaka nokdaksü ta ashi.

Hokolbarnü nungi tenzüka Taiwan indang southern aser southwestern air defence zone-i China nung indang air force tayimtsü 148 aitba mangaoka lir. Hokolbarnü ya China indang National Day liasü.

China-i Taiwan ya parnok meyong ta ashir aser nungdak dang süra tashiyim agütsü, ta shia arudar. Kasa mapang nung Taiwan-i parnok ya nüjiso ngur aliba linük ka aser parnoki nüjiso aser democracy atema raratsü ta ashiba den tensa mejungi kümdaksüba atema China aija arudar.

Linük ana tsüngda mepetmesü adoker aliba ya alima kintemi shisabulua bilemer. Japan aser Australia nati Mongolbarnü linük ana dang sensaksem ajanga ken o bentettsü mepeshi metetdaksüogo aser kasa mapang nung United States-i ashiba agi, China inyakyim ajanga tensa mejungi akumer.

China military inyakyim dang ya Taiwan-i "grey zone" warfare ta ajar, koba Taiwan

sepaitem anibeledaksütsü aser Taiwan-i kechi telangzüba agütsüdir ta tendangba ka lir, ta shiogo.

"Taiwan kümküma alitsü nungdaker. China-i tali tali jenjang agidar," ta Premier Su Tseng-chang-i Taipei nung osangbenertem dang ashi. "China-i parnok temeket nung yimjung raksatsüba aser Taiwan nongshiba alimai nguogo," ta Su-i ashi.

Taiwan tashi itshitsüla aser ka küma longjemtsü nungdaker, ta paisa ashi.

"Ajita asünung dang Taiwan atsüngtsü merangba linüktemi tashiyim amshitsü atema temulung molutettsü. Asenoki asen sasa teyari agütsü nungdang tangari asenok yaritettsü," ta pai ashi.

China nung tayimtsütem Taiwan indang air space nungbo meyimzür, saka Taiwan indang air defence identification zone mesera ADIZ nung yimzür. Iba tesem ya Taiwan-i asadanga aser meita atar aser iba ajanga parnok amokmerenba mapang jenjang tapet agütsü atema mapang tali agütsür.

Taiwan tir Tsai Ing-wen-i armed force tem modernize asütsüji tongtibangtiba mapa ka kümdaksüogo, kong mobile weapons tasen amshitsü atema rangloker inyaker aser iba ajanga China-i parnok makra parnoka kanga akoksadaksütsü.

Mongolbarnü sayaba US

magazine Foreign Affairs oset ka nung Tsai-i ashiba agi, China matsüngdang Taiwan laora Asia nung yimjung dak kanga mejungi kongshitsü.

Taiwan-i military tashi amshia tokteptsü mejangrar, ta Tsai-i ashi, "ajisüka democracy aser nüburtem taküm amokmerenra Tawain-i linük kümzüka ayutsü atema takokba tashi inyaksü," ta pai ashi.

United States ya Taiwan atema military supplier tongtiba lir aser parnoki Taiwan masetshi nongita arudar.

China-i mepetmesü adokba

ya United States dang tai tongloksüogo. Parnoki ashiba agi, US-i Taiwan dang prangbong aser hadir balala ayonga ajanga iba ya ataloker.

Deobarnü China nung pilot kati meyipa aotsü atema tetuyuba agütsüba mapang o mashiyimagi langzüka security source ka ajanga jangjashitsüogo.

Mongolbarnü Japan-ia, parnoki tensa kanga kümdanga asadangdar aser Taiwan aser China nati mangatetep aliba sensaksem ajanga bentettsü imlar, ta ashi.

"Taiwan temeket nung tensa süngjemshitsüji kanga tongtibang ta Japan-i amanger," ta Foreign Minister Toshiimitsu Motegi-i Tokyo nung ashi.

Japanese, US, British, Dutch, Canadian aser New Zealand indang navy tem hopta tatemi Okinawa anasa drills ka agia liasü, kong US aser British aircraft carriers tem densema liasü.

Australia indang Department of Foreign Affairs-ia, China-i kanga atonga inyakyim nung aibelenba atema shisabulua bilemba lemsatepogo.



Roscosmos Space Agency ajanga agütsüba noksa ka nung actress Yulia Peresild (abelen), film director Klim Shipenko (achichi) aser cosmonaut Anton Shkaplerov nungertem Baikonur Cosmodrome, Kazakhstan nung angur. Actress Yulia Peresild aser film director Klim Shipenko na ya Mongulbarnü Russian Soyuz spacecraft ka nung mener International Space Station bushia ogo aser yangji parnoki film ka yanglutsü.

GOVERNMENT OF NAGALAND
OFFICE OF THE CHIEF ENGINEER, WATER RESOURCES DEPARTMENT
NAGALAND: KOHIMA

ADVERTISEMENT

Eligible candidates are invited for Walk-in-Interview for filling up the following vacancies under the scheme National Hydrology Project (NHP) funded by World Bank under Water Resources Department, Nagaland, Kohima on contractual basis for a period of one year and flexible for extension thereafter.

Sl. No.	Name of the Post	No. of Posts	Qualification	Emolument per month	Scheme
1	Field Assistant/Young Professional	Two (02)	B.Tech/B.E in Agricultural Engineering/Civil Engineering	Rs. 25000	National Hydrology Project (NHP)

Experience:

- Preferably two years working experience in collection and analysis of data related to agriculture/ water resources.
- Ability to work in a multidisciplinary team and carry out extensive field work.
- Proficiency in MS Office.
- Excellent interpersonal skills and ability to communicate with project stakeholders.
- Good oral and written communication skills in English.
- Ability to work on GIS software will be an advantage.

NOTE:

1. The Field Assistant/Young Professional shall be appointed for one year starting from the date of his/her appointment. The contract may then be extended for another year after the successful assessment by the review committee.
2. Candidates must submit self attested photo copies of the following documents:
Admit card of HSLC for age proof, ST, Indigenous Certificate, No Objection Certificate from HoD for those already in service, Educational Certificates from HSLC onwards with 3 Passport Photos.
3. Application form may be collected from the office of the Chief Engineer, Water Resources Department, Nagaland, Kohima on any working day W.e.f. 6th October 2021.
4. No individual call letter shall be issued.
5. The last date for submission of Application Form is 11th October 2021 before 12:00hrs.
6. List of qualified candidates to appear the interview will be put up in the Office Notice Board on 11th October 2021 at 3:00 PM and the date of the interview will be on 12th October 2021.

Sd/-
(Er. HOTOVI AYEMI)
Chief Engineer
Water Resources Department
Nagaland : Kohima

Issued by DIPR

Pelaba Lemsateper



Asür. Merangso Jamir
27/09/1974 - 28/09/2021

Onoki teti meima aliba asür Merangso Jamir, pa iba akümüli nungi pila orr onok mangyim jashi nung alidang, kwinakati ozü dang temeim sayuogo, nenok ajak dang ozüi pelaba lemsateper. Nenoki semdangba aser asüpila sentep sentong nung adenba den phone ajanga osang-ola agitepa, naro, card, sempet agüja aser shisatsü agi nungitba ajanga onok molung süneptsüogo.

Maneni, ozü dang temeim sayua aser mapa tajung agi nungitta yariba asoshi Fellowship Nursing Home, Zion Hospital, Excel Care Hospital Guwahati, BLK-Max Hospital Delhi, Nok-anna, Kohima Ao Baptist Arogo, Dimapur Ao Baptist Arogo, Delhi Ao Baptist Church, Ao Senso Telongjem, Mopungchuket Union Dimapur, Zungapur, Lake View Colony Council aser Speaker of Nagaland Legislative Assembly tem dang alakteta pelaba shisemer.

Tsüngremi nenok ajak moajangma !

Pelaba Lemsateper



ASO :
14-08-1948

ASÜ :
04-10-2021

Onoki teti meima aliba asür T Akum Longkumer (Rtd.Asstt. Comdt.), pa mapang talangka shiranga alidang aser October 04, 2021 nü pa akümüli wadang tembangba tashi, kwi kati ozü dang temeim sayua aser nungita yariogo, nenok ajak dang kinungertemi pelaba lemsateper.

Pa shiranga aliba mapang Doctor aser nurse kwinakati pa anepalua aser yariogo, nenok ajak dang ozüi kangasa pelaba lemsateper.

Maneni, kija, lokti, tentet balala aser temolunger kwinakati sarasadem, rongsen aser shisatsü agi ozü asükhu mapang nungita yariogo nenok danga asür kinungertemi pelaba shisemer.

Onoki nenok mapa tajung kodanga mamatsü. Tulusang Tsüngremi nenok ajak molamoshia moajangma ta ozüi sarasademtsür.

Temeim Kinungtsü, Chirnurtem, Semchirtem, Anük-Apangtem aser Kinungertem.

Fazl Ali College nung Alumni Meet 2021 agiogo



Mokokchung, Mongputeni/ October 05, 2021 (TYO):

Reju (institution) nung lenla ajungalen terenlok alitsü atema Alumni den tesendaktep tajung ka ayutsü nükjidong yur, Hombarnü (04.10.2021) FAC Internal Alumni Committee-i College Auditorium nung 'Alumni Meet 2021' sentong ka ayonga agiogo, ta sangdong ajanga metetdaksü.

Alumni tem college nung kaketshir ka ama azüingdang parnoki inyakba/ajangshia aruba tem biletmeta item nung asadangshitsü aser parnok dak aketba sempet tali jangjatetsü atema iba sentong agia liasü.

Iba Alumni Meet ya session ana lemsar agiogo. Mezüing Session nung, Dept. of English, FAC, Asstt. Professor, Bendangsenla menden liasü aser lai Alumni tem pelashishia agizük. Alempang Baptist Church nung Youth Promoter,

Imkummeren aser par medemertemi ken ka aten aser iba den külemi pai anir teloki college Anthem tena liasü.

SDO(C) Mokokchung, Sentilong Ozukum, shiba college indang Alumni ka lir, pai 'My Alma Mater' onük nung ajemdaker jembii. Pablo Picasso indang quote "The meaning of life is to find your gift, the purpose of life is to give it away" nung ajemdaker pai sentong nung adener ajak dang, lennir ka ama nübur tenzüksü nükjidong yur inyaktsü ajungshio.

Iba dak sendakba nung paisa, anogoshia taküm nung temelenshi tajung adoktsü asoshi teshisadangba melenshia inyaktsü, teti angazüktsü, pei akokba/ajangzükba nung temolung lema malitsü saka taküm nung pei nükjidong meteta alitsüla, ta metetdaksü.

HoD, Dept. of Sociology & Co - Convenor, FAC Internal Alumni Committee, Dr. Adangla Changkija-i tepela anküp o jembii. Rev. Ponen Longchar, Pastor, MTBA-i Alumni atema sarasadem tajung ka agüja iba session tembang.

Maneni, tanabuba Business Session nung, IQAC Coordinator & HoD, Dept. of English, FAC, Dr. Lanurenla menden liasü. Lai, iba college indang nukla aser mapatong tem aser Alumni Committee tajung ka alitsü nungdakba indang lemsatepa liasü.

Nomination Committee ka ajanga Alumni Association atema Office ketdangsürtem tenüing agüja liasü. Iba business session tembanga, menden ajanga sentong nung adener Alumni ajak dang pelaba metetdaksü, ta kasa sangdong nung shia lir.

FIR mebenoki ghonda 24 dak tema...

Sorkari Priyanka Gandhi kanga tsübur aser ibayongji la sota ayuba sülena la inyakim jangjatsü atema drone ka amshir, pai tweet asü.

Congress lenirtemi social media ajanga sorkar aitsüba mapang party züingsemtemi Hombar aonung menoa tashi longkak ait aser PAC battalion complex kima mejang.

Congress züingsemtemi Mongolbar anepdang ajema aküm saka 10:00 ako sülen state kübok tesem balala nungi parnok Sitapur-i aru aser PAC battalion complex

temeket nung aliba hotel tem ajak mekazüka anen.

District ketdangsürtemi ashiba agi, temzüing ozüing tsütsü tensa azüoka lir. Kasa mapang nung Srivastava-i ashiba agi, ozüing alema party lenirtem sota ayuba ajanga Congress züingsemtem mepelar.

"Ato Kilonser Lucknow nung benjung kati adeni arur aser kasa mapang nung Lakhimpur nung aluyimertem ochi obendang ka atema yongyaa atatepdar," ta paisa ashi. PM Modi-i Mongolbarnü

(Tapak 7 nungi...)

Lucknow nung 'Azadi ka Amrut Mahotsav' sentong ka tenzüksüogo. Deobarnü asür nisung ti rongnungi pezü aluyimer liasü. Parnok ya Uttar Pradesh Deputy Chief Minister Keshav Prasad Maurya agizüki oya aliba BJP züingsem kati tsükset. Gari nung mena alirtem ya longkak aitertemi gari nung anizük aser zükseta liasü.

Uttar Pradesh Police-i Union minister Ajay Mishra'er jabaso Ashish anema ken o ka benokogo saka tang tashi mepui lir.



Paris, Mongputeni/October 05, 2021: Trocadero, Paris kübok ayongba Paris Fashion Week sentong nung, "L'Oreal indang Spring-Summer 2022 Ready-to-Wear collection" nungi sübotsü temesüing ka semer Aishwarya Rai Bachchan-i sabang nung shilem agiba noksa nung angur.

Miss Nagaland Sachü-i ANTA football jersey sayaogo



Kohima, Mongputeni/October 05, 2021: 21buba NSF Martyrs' Memorial Trophy atema ANTA team indang jersey sayaba mapang, Miss Nagaland Vikuonuo Sachü aser Miss Phek first runners Lovi Jidoji na den ANTA ketdangsürtem aser asayartem külemi tangokba noksa ka yangi angur.

Kohima, Mongputeni/October 05, 2021 (TYO): Aruya aliba 21buba NSF Martyrs' Memorial Trophy 2021, koba October 9, 2021 nungi tenzüka November 6, 2021 tashi Indira Gandhi Stadium, Kohima nung asayatsü terenemba lir, iba asayamung atema Mongolbarnü, Miss Nagaland Vikuonuo Sachü-i All Nagaland Taxi Association (ANTA)

Headquarter Kohima team indang jersey aser water bottle densema uniform sayaogo. Hotel Crescent kübok sentong ka agiba mapang, Sachü den jersey sponsor ANTA treasurer Kelhoukhrilie Chielie aser ANTA joint secretary Aphrelie Suokhrie nati team indang jersey saya liasü. Iba sentong nung Sachü-i, ANTA Hq Kohima ya tentet

tuluka lir kechiyong iba tentet nung züngsemtemi nüburtem atsüa arutsü asoshi inyaker. ANTA ketdangsürtem aser züngsemtem tsüngda telongjem aser tesendaktep tajung ngua, lai pelaba lemsatep aser Naga telok tentet aika dak iba ama tesendaktep tajung mengudang ta lai ashi. Saisapong dak sendakba nung lai ashiba agi, State nung saisapong jenjang tajungba

achaayangtsü asoshi timtemer kechiyong item dak sedakba kisüjensü (infrastructure) peria maliba aser saisponger tajungtem ajungshitsü asoshi lenmang peria maliba ajanga aiben asenoki mepetmesü ajurur.

Ajisüaka, iba saisapong asayamung nung ANTA-i shilem agitsü lemtetba asoshi lai pelaba lemsatep aser iba mera agiba ajanga züngsemtem tali dang ajungmesotsü imlar, ta lai ashi.

Laisa, team dang tajungtiba nung shilem agitsü ayongzük aser ANTA Hq Kohima tenüng amer saisapong tanela nung bendanga agütsür asayatsü asoshi team ajungshia liasü.

ANTA Hq Kohima Dziesevituo Solo-i, tentet indang sentong tem metetdaksüba mapang, pai tenüng agütsür alir (registered) züngsemtem nem angati service agütsütsü atema Ambulance service ka tenzüksüo, ta ashi.

Saisapong aser asayamung ayongba dak alia, züngsem ajak ajanzüksü asoshi sangküm nungi ANTA-isa tentet indang recovery van

service aser insurance scheme tem lapoktsü asoshi asalentong yangludar, ta paisa metetdaksü.

ANTA general secretary Meyieho Hibo-i, pei ajanzüksü kisung atema dang masü, saka temang atema teyari agütsüba inyakyim ka ama angateta ajaki tangatetba tajung nung shilem agitsü nüngdaker, ta lemsatep.

Mangatetep mesü r a r a b a n g s e n madokdaksütsüsa, paisa team dang saisapong yimya angateta ajemalu tanela nung asayatsü asoshi ajungshiogo.

Iba team nung Kohima kübok taxi kibur aser taxi anishir (driver) tem den lir.

Maneni, iba sentong nung ANTA founding member Ruokuophrelie Belho, ANTA Action Committee convener aser team coach Menuosietuo Yiese aser Miss Phek first runners-up Lovi Jidoji nungeri team nung asayar ajak dang tajungtiba nung shilem agitsü ajungshia liasü.

Iba sentong tembanga, ANTA Hq Kohima Ruokuopielie Rutsa-i tepela anküp o jembi.

ISSF World Junior Championship: Naamya o Tomar nati gold medal angu



Lima, Mongputeni/October 05, 2021 (Agencies): Tang asaya aliba ISSF World Junior Championship - tetsür 25m pistol asayamung nung, India tsür arishi küm 14 tain Naamya Kapoor-i gold medal nguogo. Tetsür 25m pistol tetoktepba nung, asayar tasen Naamya-i külem India tsür Manu Bhaker menepa asaya temaba jenjang tongtet. Kasa asaya nung Manu-ia tasembuba jenjang nung takok ngua bronze medal angu. France tsür Camille Jedrzejewski (point 33) aser arishi küm 19 tain Olympian Bhakar (point 31) na ajangeta

asaya asoshi, final nung Naamya-i point 36 ngua liasü. Iba asayamung nung Manu-i gold medal asem tashi ngua lir. Iba asaya shoot-off nung Camille-i Manu madak takok anguba sülen, Manu-i bronze medal ngua liasü. Ano, India tsür shooter Rhythm Sangwan jenjang pezübuba nung tembanga. Qualification nung Kapoor-i point 580 shi tongteta la jenjang trokbuba nung liasü. Final atema Bhaker (587) aser Sangwan (586) nati temaba jenjang ana tongtet. Naamya ya Delhi nungi lir aser taküm August ita Dr Karni Singh Range nung

national shooting selection trials agiba mapang, qualification nung lai point 583 ngua jenjang pungobuba nung tembanga.

Kasa asayamung, 'men's 50m rifle 3 positions' nung India nunger shooter tasen, Aishwary Pratap Singh Tomar otsü tasen yangluba den külemi gold medal nguogo.

Junior world tetoktepba qualification nung Tomar-i otsütsüsa point 1185 angu. Iba den külemi final nunga pai point 463.4 shi ngua point 7 agi France nunger Lucas Kryzs tejakdang ser tembanga. Lucas (point 456.5)-i silver medal aser America nunger Gavin Barnick (446.6)-i bronze medal angu.

Kasa asayamung nung külem India nunger rongnung Sanskar Havelia-i 11buba (point 1160), Pankaj Mukheja-i 15buba (point 1157), Sartaj Tiwana-i 16buba (point 1157) aser Gurman Singh-i 22buba (point 1153) nung tembanga.

Tang, iba asayamung medal tally nung India-i temaba jenjang tongteta lir. India-i gold medal 8, silver medal 6 aser bronze 3 densema medal 17 tashi nguogo.

Tokyo Olympics temer külen nungi multi-discipline shooting asayamung ayonga asayaba rongnung ISSF World Junior Championship mezüng asütsü. Iba asayamung nung linük 32 aser athlete 370 jungnüa agi shilem agidar.

Billie Jean King Cup nung Ashleigh Barty masayatsü

Sydney, Mongputeni/October 05, 2021 (Agencies): Taruba ita Prague nung ayonga asayatsü aliba Billie Jean King Cup nung World no.1 Ash Barty-i shilem magitsü, ta Mongolbarnü Tennis Australia-i ashi.

Tan season nung Barty-i asayatsü asüng magitsü ta osang mejangjateti aruba mapang ka Australia tennis squad nung la madenba osang metetdaksa liasü.

Tan ita California kübok Indian Wells asayamung nung Barty-i shilem magitsü lemtetba sülen, tetsür team tennis tetoktepba, koba dang taoba mapang Fed Cup ta nüngja agütsü, iba asayamung nungi la tukadoker asütsü.

Barty-i Billie Jean King Cup nung shilem magitsü osang dak sendakba nung Tennis Australia-i kuli ka magitsü aser parnoki November 01 nungi 06, 2021 tashi Czech Republic nung asayatsü aliba asayamung nung world no. 47 Ajla Tomljanovic-i anir Australia team nung asayar pungoi shilem agitsü ta ashi.

WTA Finals densema tanüngba 2021 season nung Barty-i shilem magitsü osang lemtetba ajanga tebilemstü adoker.

Taoba küm (2020) alima ajunga asüngba Covid-19 wara ajanga WTA Finals thitsütsü

telemtetba magidang, 2019 küm lai WTA Finals title koka lir.

Barty-i tan tennis season nung takok ngua shilem agia liasü, kong Wimbledon densema lai tittle pungo shi takok angu. 2019 French Open den külemi lai Wimbledon takok anguba ajanga lai Grand Slam tanabenbuba koka liasü.

Ajisüaka, September tetenzüklen US Open tetsür kija tasembuba round nung America tsür Shelby Rogers-i la tsükdaksür külen nungi asayamung ka nung danga lai shilem agidanga mali.

US Open temer sülen, Barty indang coach Craig Tyzzer-i ashiba agi, Australian Open, koba Covid-19 ajanga thinena arur sülen, sangküm January nungi tenzüksütsü sentong lir, lai iba asayamung nung shilem agitsü asoshi renemshia atatsü tebilemba lir.

2020 küm Barty-i Australian Open semi-final tashi tongteta asayaogo.

Barty-i season tatemlen WTA Finals atema Mexico-i aotsüsa kümra, la iba asayamung nungi meyipa arudang Australia indang Covid-19 dak sendakba temzüng nung anidaka kidang hopta ana shi quarantine' asütsüsa akümer, koba ajanga la training nung tetsükdaksü adoker.

BILEMDANGANG

"Tilariang timtem khuret ajak meteta abener."